

Nenta'melquescama Engyempehec IV

Nentemquescama Engquetca



Nenta'melquescama Engyempehec IV

Nentemquescama Engquetca

Apqueltaalhooscama
Ernesto Unruh nahan Hannes Kalisch;
ayenyemay'acilha' amya'a Eligio Ferreira;
aclhaalhma dibujo pangca'aoc
Ernesto Unruh, Orlando Unruh nahan Argüello Raúl



2000

Ya'alve-Saanga

Nengvaanemquescama Nempayvaam Enlhet

Amya' Apcatcoc

<i>Nentemquescama Engquetca</i>	3
<i>Alta'heeycam' Seca'a</i>	3
<i>Acteeyam' Paana'teem-Lhangcoc Seca'a</i>	4
<i>Acteeyam' Seca'a Payhoo Tengma ac Quelvaana'a</i>	5
<i>Aleltemnaycam' Quelvaana' Alvaanyam'</i>	6
<i>Acteemaclha' Acteeyam' Seca'a</i>	8
<i>Seciha' Acteeyam' Seca'a</i>	8
<i>Nenta'melquescama Seca'a Quelhvoo-cteeyam'</i>	9
<i>Nengvetay' Mepque Neme-pyengmenec</i>	11
<i>Nengvetay' Acyemtalhnama</i>	12
<i>Nentengyey' Seca'a</i>	14
<i>Ayenyemay'aclha Seca' Ava'lhoc Angquen'</i>	14
<i>Nenlha'maeclha'</i>	15
<i>Mepque-nseca'a</i>	17
<i>Ayaasommalhquelha-ngcatnehe-nglavsooc Quelvaana'a</i>	19
<i>Englapamcoo'</i>	20
<i>Acteemaclha Sengelyamhapma</i>	22

Nentemquescama Engquetca

Mepque nengvetaycaoc cavanaamoc seca' ava'lho-ngquen'. Catneclhehe-yque-ngcatnehec aatay, taan capekham' catyamoc, coonohoc alta'heeycam'.



Alta'heeycam' Seca'a

Catnatsehec saat acvay-ventamo vocmo quelvaana'a, cateetaoclhohoc nahan mooc acyesvooom; caamquetque-yque-nhan catyamo yetca. Nataamen, avanquec caltemnacsec ataava', lhoyquela angquen' nahan ang-yepyaamong, quelhvoooc saat callaaneclhac altamhaclha'. Mepque-yca' acmangcactama yo'-yaam' calheenec amame' yo'yaam' catyamoc ayetca, han' alta'-haamca'a nac secaa' a, naekhe' angnam' acmoolhama altaamay' alpasmoom actemquescama yetca. Ta'sec maata'a calyeheclhohoc altemnaascaoc, yo'yaam' cata'mele-ctemquescama.


Yetneec a'net acteemacilha nentemquescma engquetca, acnoo nac tengma engac nahan paana'teem-lhangcoc. Quelhyavaam'ooc lha actamhaclha nenga'tooc paana'teem-lhangcoc, calhnooc aha, mepquelha paana'teem-lhangcoc. Angnam' eeca' almoolhama

quelvaana'a lhamoo' almo-
vaan calpasmoc quelvaana'
anglavsoo'. Ta'sec calpas-
malhcohoc maata' acnoo nac
promotor, yo'yaam' calhya-
veeclha-ptamhaycam'. Acnoo
moooc saat alya'sengvaeclhoo
acnoo nac quelvaana'a nahan
promotor, calya'mongsalhcac
vesey' maata' almovaan.



Acteeyam' Paana'teem-Lhangcoc Seca'a

Heey', actamhaclha nenga'tooc paana'teem-lhangcoc, nataa-
men vocmec angcooc paana'teem-lhangcoc quelvaana' anglavsoo',
capasmoc saat paana'tee-ngquen' naysecsa-ctemquescama yetca,
epasmoc saat nahan promotor nahan aptaava'. Nataamen yetneec



nahan maata'a quelvaanaa'
enlhet lhamoo' acmovaan ca-
temquessec ayetca moooc, coo-
valhcac saat nahan, yo'yaam'
calanam' moooc. Sas elaasen-
naam' promotores quelvaana'
acvaanyam', yo'yaam' capas-
moc moooc nahan caltemna-
samcoc amamyec-temquesca-
ma yetca.

Acteeyam' Seca'a Payhoo Tengma ac Quelvaana'a




Mooc quelvaana'a, angneec maata'a mepquelha paana'teem-lhangcoc, paej cvesey' maata'a paana'teem-lhangcoc moo-pcaoclha'. Paej lha'a-nhan cay'aacmoc angcooc cay'acsec paana'teem-lhangcoc tamha-nyekhe nenga'too'. Quelvaana'a nac hay', ta'sec capenacsohoc catengyam' allhaalhma'a, acnoo nac quelvaana' altaamay' acpasmoom mooc actemquescama yetca. Ta'sec maata'a-ngcatnehec nenga'too', ayeenmoo seclha-ctemeeme-nglavsoo', taan saat caltemnacsec acvocmo saat alta'heeycam' seca'a.

Quelvaana' anglavsoo' actemquescama angcoo yetca tengma, caymaalhqueec capenacsohoc nahan almaycam', acnoo nac altahanma saate-nseca'a nahan actalhnama apca'alhnay'oo. Mooc saate-yque maata'a capasmoc acvocmo saat actemquescama yetca, lhoyquela-nhan ataava', acnoo na-ctengyey' yengmen, aya'alhnay'oo-yca', haave-cyetnama angcoo', yo'yaam' ca'alhnacse yempehec alhaaye', nahan ma'a-nseca'a. Eeque-ngcapco yengmen aya'alhnay'oo, cahanec saat seclhoo', yo'yaam' caletsapoc ascoc, camascoc saat nahan nengmasqueema ac yengmen, taan caselhnanalhquehec seclha-cyephongvay' seca'a, acnoo-nhan angquen', naekhe' acyevy' saat acteyapma eema ac.



Capenacsohoc saat nahan savov 'yetcoc acma hamtec yo'-yaam' caya'temenalhcaac saat atalhna seca'a. Cayetnam' saat nahan a'tec cal-haanec seclhooc allhaalhma'a ayaamque-to-ngcaya'temenalhca talhna-nseca'a, nataamen saat capenacsohoc nahan taalha nahan hanme-naatelh. Eeca' 'so mokhanma savov yo'-yaam' caletsapoc nengmasqueem alyepetqueeycam'; naekhe' quelyemyekhamquec maataa' aapetec.



Nempeeneescamoo-nhan paana'tee-cyelhvaseem nengacnaycam' saat atalhna-nseca'a, yo'yaam' catnengvomhoe-cyemseem. Nooc nahan mooc sas manten aava'; eeca' acna quelvaana' acyepelqueemoo yamta'a altamha angcoc angcooc nengyemseem. Nataamen ampenacsohoc nahan apaava naapokha', yo'yaam' calhec acteta atalhna-nseca'a, apaava apca'alhnay'oo-yca', acnooclha nac maata'a nentemesqescama nengyemseem a.



Aleltemnaycam' Quelvaana' Alvaanyam'

Lheenalhqueec maata'a quelvaanaa' enlhet altamha-lhnec al-yemna'teem angca'voo'. Cahalhacsehec ne' ctemsa yetca, quelh-

vooc ne-ngcata'heclhac tengma ac, mepque-cyetnama-cvangcacho-
ho paana'teem-lhangcoc. Caa lha' angquenyemay'ac aleltemnaas-
caoc acpeyvomoo nahan acta'mela quelvaana'a lhamooc enlhet.



Ta'sec angelyepsetec al-
temnaycam' teemaclha nanoo'
quelvaana' acvaanyam' acve-
sey' Teye'e acna Canavsá, Ya-
'alve-Saanga: *Ayaamqueta-ng-
catemsec ayetca quelvaana'a,
alta'haamca'a na yetca a, cal-
paasengvaclhac maata' ang-
na'aymac. Vaamlha-cnaat cal-
teclhoo tapnaoc quelvaana'
amamyec-temquescama yetca,
taan capasmoc maata'a mooc
almaycaoc, cayhengsamcoc
maata' ameoc avocmo', catya-
mo' 'sa seca'a naalhpoc. Paej*

*naate-ycá cas, naekhe' engmooc sempasmoom, almaycaoc a engca-
poc, capathetamcoc aayapoc mooc. Savov atquetsec eeca ma' ac-
ya'tamanma atalhna seca'a, paej
cvesey' a'soc nanoo'.*

Ta'sec nahan angelmalh-
naam' maataa' engangca'vooc
nengmoolhama alvaanyam', yo'-
yaam' hengeltemnasam' amyaa'
angca'aoc acteemaclha' alvetay'
maata'a naysecsa aleyvaam, yo'-
yaam' angya'sengveclhohoc
nengco'o lha' acpeyvomoo.





Acteemaclha' Acteeyam' Seca'a

Amamye' yo'yaam' catyamoc seca'a, coonohoc saat acyemna'teem acmasca va'lhoc angquen', nengeltemeem alta'heeycam' seca'a; eeca' actamha acta'melquescamoo ayeelhye-yaam' seca'a nahan acmaayahay'ooc-lha-ngcatyamoc.

Ayeenoolha', camayheclhac saat aatong ac seca'a, nataamen cayeplav-hoc saat acteeyam'. Yehemec ne-ycacatyamo-nseca'a quelvaana'a seclha-cvetay' yetca; quelhvoo-yc'a a, altaamay' acvetay', mayhemquec vesey' aatong ac seca'a. Acmaaya'voo saat catyamoc-nseca'a, nengaapa'heeycam' nec ansatalhca', yo'yaam' catyamoc quelhvoo', nec naat caltemhohoc quelvaana' alvaanyam' aleltemnaascaoc ayetcooc.

Seclha' Acteeyam' Seca'a

Seclha' acteeyam', anglecsec saat naa'at seca'a, yo'yaam' catlhec-ava'lhoc nahan avaahe'oc acnoo nac ayapma yengmenec. Cayeplav-hoc saat acveenama, ayenyem'a alh-nangcoc acvetay'. Nataamen acmasca saat alennamaam atalhna', ang-ya'temensec saat savov nec lhaac acma hamtec.





Nataamen quinse lhoyquela traenta minuto, catyamoc saat alhaaye' atalhna'. Eeque-ngcatyacmo, taan calhec alya'hapsa ava'lhoc quelvaana'a, yo'yaam' catyamoc. Eeca' 'so acpeensalhco-ctee-yam' seca'a, calahapvomhoc seca'a nahan angquen'. Cameesec saat nema ac seca' angquen', nataamen catoc catay'a seclhoc angcooc congne' ava'lhoc angquen'. Pee-naasque-cteyacmo-nseca'a.

Eeca hay', haave lhapcooc quelvaana'a; angnam' angna'aymac, yo'yaam' callanam' nahan calpasmoc. Selhteec nengyaapongcaanammalhca sengelaanaamcaa' engmoooc nahan sengelpasma maata'a.

Nenta'melquescama Seca'a Quelhvoo-ctee-yam'

Alhaaye', calhec saat acya'passa yengmen seca'a, calhec nahan ayahapsa apaava, yo'yaam' calnaamquehe-cmalhqueemoo-lhma' nahan acmakhetmoo. Angacnaam' saat nahan paana'tee-cyelhvaseem nav'a talhna mocya'tamanma, taan ampelhteetec apaava-lhnec lhaac apca'alhnay'oo. Anta'melsec saat alaanaalhcoo-cnem', angelaanohoc maata'a, acvaecmoo acteyacmo angcooc nav'a talhna', maalha lhamma semmaana.




Eeca' 'so nengeletsavaasoo nengelvet'a-nseca'a, teema nac nahan nanoo', acnoo nac altemnaycam' acvesey' Sa'co-Yenyeem acna Lhaapangcalvoc:

Catemsec ayetca quelvaana'a, catlapsec angvetac ca'aynentac angcoo', haave-cvesey' tengma actemquescama, vaamlha makhay', nalhma', mepquelha tengma. Mooc quelvaana'a, anglaanentaamohoc ca'aynentac ayetca, vaamlha-yca maaleng ayempehec moya'lascama, paej apaava seclhooc naat lha'a, vaamlha maaleng ayempehec allamtalhnama seca'a, taan nahan popyet apyempehec. ¡Saaas eeque ma' acteema!, mocyeela'aquescama, teema nac apaava, ¡saaas eeca'!



Ayeenoolha', paej mooc actoom seca'a, vaamlha nema ac angquen' yo'yaam' catooc, acvaecmoo nooc-naapokha pelten'. Seca'a nac mepque-ngquen' a, lhoc'aac maata'a leche aanec; selhtee-yca' acyemna'teescama, nengvet'aac maata'a; akhaalhammalhcoo-ngcatnehec seca'a nac hay', nahan atquetsec; paej calhnooc actava nac nema ac angquen' a. Ta'sec saat cateetsaoclhohoc mooc ayaycaoc nema ac ayetca quelvaana'a, yo'yaam' ca'hehec maec, quelhvooc saat cayemna'ac seca'a nahan cavanaamo'.

Mooc'alhma'a-nhan cahec alma, han' ala'alhna'a nac a, yo'yaam' nec naat calta'hehe-nseca'a, vaeclhoo atecvahan moya'alhnaascam', taan saas atecvahan seca'a. Queltaamay'aac enlhet acteema nac hay'; queeltaamaycamquec quelvaanaa' enlhet acteemaclha' alpas-moom mooc actemquescama yetca.



Nengvetay' Mepque Neme-pyengmenec

Nengvet'aac nahan maata'a mepque-lh nec neme-pyengmenec ac mooc quelvaana'a. Nooclha' angcooc ne-nyekhe'; haave-lhne-c-masoom lha. ¿Lha' actamha ye? Heey', yetnee-nyekhe neme-pyeng-



menec, vaamlha-yca selhtee', ayelhyavay' nahan, haave leche angcoo', vaamlha-pyengmenoo', maalha paana'teem, maalha-lh nec alaa-hac ayengmenec acmeescama angcoo-ngquen' ayetca, yo'yaam' ca'hehec nengmasqueem.

Selhtee nec mokham aya'heem maec seca'a, seclha' acteeyam' nac a; nooc nec cayep-canmohoc seclhoo neme-pyengmenec nec lhaa-tquetsec. Nataamen, actava maata'a hay', quelhvooc ne-ngcayaaveclhac neme-pyengmenec ac angquen'. Nooya'ac actaasacmo-lh nec maata'a poo neme-nseca'a, nanooc ne-ngca-

yaaveclhac neme-pyengmenec ma' angquen', cayeechahalhcac nahan seca'a acmoo-lhneec lhaac alaa-hac ayengmenec. Quelya'saamcoo-y-que-lvaanyam', yo'yaam' cayaaveclhac quelhvooc neme-pyengmenec.



Mooc amya'a-nhan acya'ascama quelhvaa-ngna'laava. Ta'sec nec cata'melsalcohoc seclhoo', maalha lhama pelten', yo'yaam' cayemne'eclhoho', ayenyem'a taapelhqueemoo-ctemquescama yetca; caasalh-queec catengyohoc quelhvooc ayem-pehec, catnehec ne-cnooclha' ang-coo-khaalhammalhca', cayemna'-teem, nahan pelhcay' ca'hec neng-masqueem.

Nengvetay' Acyemtalhnama

Eeca naysecsa-ctemquescama yetca, vet'aac maata' acyemtalhnama mooc quelvaana'a, acnoo nac seca' actemyescama acyeta nama congne va'lho-ngquen', lhoyquela almeayayquenta mancoc; catyemehec saat. Angneec naat maata'a quelvaana' acmovaan calya'haapo vocmo mooc, yo'yaam' cata'mele-ctemquescama yetca. Angnee-lhca laa-kham ayaoclha lhey'a' acteema nac quelvaa-






na'a lha; caymaalhqueec angvetec-lha'. Capco saat, taan angya'acsec paana'teem-lhangcoc nengvet'a ac-teema nac hay', yo'yaam' calhec sempasma.

Nataamen yemtelhec angcooc nahan camayha nac aatong ac secaa' a, cavanquehec vesey' catyapoc, taan catsapoc, acvaeclhoo-ngquen'. Calhec saat acpa'alhqueta quelvaana'a, han' actamha na-cyemtalhnama angcooc a; catepa na-nsecaa' a.

Eeca nenlheena-lh-cac, selhteec maata acvetay' acyemtalhnama nay-secsa-ctemquescama yetca enlhet, taej nahan ayem-pehec, ayenyem'a acpeyvoo-moo aleltemnaascaoc ang-na'aymac quelvaana'a. Ta'-sec saat calta'melsec nahan calyenyevehec quelvaanaa' enlhet almovaan nac hay', acnoo nac calvaatseezcaoc aleltemnaascaoc nahan al-pasmoom mooc; yemtelhec vesey' ayesoomongvocmo-m'a acteyam' seca'a. Nooc nahan maa' a'net seca'a congne' ava'lhoc angquen', sas saat acpalleyaam', han' actamha na-cmovaan catemse yetca a, nahan acmovaan actamha-cpasmoom.



Nentengyey' Seca'a



Yetneec nahan amya' actee-maclha nengvetay' seca'a nahan mongvetay' seca'a. Ta'sec nahan angelyepsetec actee-maclha' amya-'a nac hay', yo'yaam' cayetnam' enga'tec.

Mongvetay' Seca'a.

Ayenyemay'aclha Seca' Ava'lhoc Angquen'


Yetneec quelvaana' ava'lhoc lhama seca' alhangcoc. Yav'ac-lhoho pelten', teepeeclheec lhama actec ava'lhoc quelvaana'a, yet-nacmec ma'a seca' alhangcoc, yo'yaam' catneclha-nseca'a acyepetca'a saat ayenyem'a taava'. Eeque-ngcapco lha, cam-moc saat acnem' acyamasma-ctoom quelvaana'a, catyapoc saat naysecsa eema ac actec lhaac.

Eeca' acyoot'oo-ctemeem aatay actec acyepetca' ayenyem'a taava', eeca' 'so paa-ngcatneclha-nseca'a, quee-nooc actemeeme-nglavsooc quelvaana'a;



cay'asamquehe·yca seclhoo', yeheme-ngcay'aasengveclhoho'. Na-taamen apvocmo nueve pelten' acyetsnama seca' ava'lhoc angquen', cavomoc saat acnem' acteyaycamlha'.

Cavanquehe·yque·ngcatnehe·nglavsooc quelvaana' actamhac-lha·nglapamcooc actec ma'a seca' alhangcoc. Acnoo nac ayaam-



quetveclho pelten' ac, maalha tyes acnem', acvaclhoo mok-ham tyes acnem' acyeecahay' acvetay' eema ac, aalhtooc ey-tohoc lhamooc ataava', coote-hec saat ayetca. Nooya'ac ma' actamhaclha' aatay actec, ac-yoot'oo·m'a apyetnamoo lha-moo', lavsooc saat catnehec.

Eeca' 'so yo'yaam' calpa'me-

hetsalhcohoc maata'a quelvaana'a nahan ataava', yo'yaam' calho-hoc mooc aleltemoo·ngcalveta·nseca'a. Nooya'ac calpa'mehet-salhcoo, melquetnehec saat cayetnakhohoc ava'lhoc aptaava' enlhet, calquetnehec nahan cayetnakhohoc apva'lhoc ataava quelvaana'a; calhoec saat mooc ava'lha'aoc.

Nenlha'maeclha'

Ta'sec angcooc enlhet nahan aptaava', calpa'mehetsalhcohoc ac-teemaclha nenlha'maeclha'. Ne-ngelpa'mehetsammalhca' acvesey' acnoo nac ¿Ca la·cvaam' angvom-sehec engquetquec? ¿Calhoho·ylaa




lha'a saat engyempehec nengelta'melquescama anteetsaoclhohoc mooc seca'a? ¿Paa-nlhoyquela ampacansomoc seclhoooc nentengyey' seca'a?

Caymaalhqueec cayetnam' enga'tec, noo-ylaa lhaa' engyempehec aclha'moo-nseca'a. Maec lhoyquela-ngcalnaapoc, mongelya-halhcoec lha'a-nhan alnapanac nengmasqueem a. Caytec la-nyekhe' apaava engquetquec, cata'pongvaclhohoc saat lha'a-yca maata'a mooc. Elaanoho apvaanemquescama-cnaat maata'a seclhoooc lhama-pquetca enlhet nanoo', taan etengyec-lhac mooc acvaanaamo.



Noo-nyec nahan nengco'o lha quelhvoo nac hay', han' acvaanaamo engquetca lhama, ta'sec antengyec-lhac mooc, haave nentem na'sa lhama. Nengasalhqueec anghalhalhcac nengvaanem-

quescama engquetca, canyeemac saate-cvesey' acpayhaelha' engva'lhoc engmamy'e'. Sas angcooc acma engquetquec, calpayheclhac ava'lha'aoc angcanaec. Nooya'ac mepque seca'a, catlhoec nahan, engquetquec maata' acpaysaelha' engelva'lha'aoc. Eeca' nengeltamhoo anlha'macsoho', sas; quellheya saat calya'samcoho', lheya' nahan ataava'.






Nataamen sas ampsmoc maata' alnapa saat nengmasqueem, nahan nenggeltemnaascaoc alaanaalhcoo amya'a. Eeca' 'so yo'yaam' mongvetyehc alselhnaanammalhca' engquetquec, cactong saat, vaelhoo nengvetassa alya'sengveyaam', yo'yaam' callhong angca'voo' nahan callhengsec angca'vooc nenteemaclha nenge-laaney' a'soc acpeyvomoo.

Mepque·nseca'a


Eeca nengeltamhoo saat ampacavomoc seclhoo' acteemaclha nengvetay' seca'a, heey', yetneec paana'teem ma'a nalhma'. Nengaa-salhquee-yca' angvomo' 'sa, mepque sengeltemnaascaoc nahan sengelaancaoc quelvaana' alyecpelqueemoo yamta'a nac hay'. Nooc nahan ma' acnamco-m'a paana'teem-lhangcoc, cay'acsec nahan engyempehec, yo'yaam' hentavacsec mongya'saamco-lteemaclha'. Eeca' 'so yenyem'a anlheenec na'atque' alteemaclha paana'teem mepque·nseca'a:



- * Lhama acvesey' vanteeta mocpacanma payhoo seca' alhangcoc. Quelvaana' acyetrnaclha vanteeta ac, caymaalhqueec catengyac maata'a molaaney'oo, ayenyem'a mooc'alhma'a catnengvomhoc ava'lhoc quelvaana'a vanteeta nac hay'.


* Mooc acvesey' paana'teem actec, na'sepquec maata'a quelvaana'a yav'aclhoho-cnem', vaamlha lhama actec. Cata'melehec camom' quelvaana'a naysecsa-ctoom mokham neme ayetca, cay'acsohoc vesity' neme-pyengmenec paana'teem nac hay', taan cayamhovacsec secaa' a taap, cay'ansec nahan. Seca' angquen' saate-yque-ngcay'asamcoho' ac-lhaalhma taava'.

* Yetneec nahan mooc paana'teem mepque-nseca'a acvesey' alahac. Alahac nac hay', acya'ascama-nhan engyempehec, acyevy' catnesseclhac quelvaana' aclhoy'. Eeca' 'so yenyem'a callhavamcoc vaamlha quelvaana' altamha yaam alvaanyam', acnoo nac acyeechay' traenta aanyo oc; caa-salhquee-yca' ayetcoc.



Han' yekhe' aclhoy' maata'a quelvaana'a paana'teem nac hay'; eeca' enlhet, capvanquehe-nyeheclha' 'sa actengyeeycam'

amya'a lhapcoo-ptava'. Ta'sec calpa'mehetsalhcohoc maataa' a'net nac hay', yo'yaam' calhohoc mooc ava'ha'aoc. Nataamen ayac'a lhama paana'teem mepque-nseca'a quelvaana'a, yetneec nahan mooc, yo'yaam' cootehe yetca.



Ayaasommalhquelha·ngcatnehe·nglavsooc Quelvaana'a


Nengaascama·yca catnehe·nglavsooc quelvaana' acvaanyam', han' acyeca'a nac cuarenta aanyo oc. Cahalhalhquehec vesey' coota·cyemtalhnama naysecsa·ctemquescama seca'a, lhoyquela cootac ayetca camovaana' ay'.

Nooc nahan quelvaana' acmasca yempehec angcoo', acnoo nac ayetsep-moo nahan alya'yescama maata' ameoc nahan actalhnaeclha yennamaam, nataamen cavaclhohoc saat ma'a seca'a.

Paej nec nahan cata'melooc cateetaoclhohoc moo·cvetay' ayetca quelvaana'a, calmeyavhoc vesey' actoycaoc neme; calaanoho·cteema maata' atquetsec seca' anacsa. Cataapelhcohoc nahan quelvaana'a, ayenyem'a taap actengyey'oo yempehec naysecsa·ctemquescama yetca, casavhalhcoho·cyemna'teem. Eeca' acvocmo maalha a'net aanyo, taan caasalhquehec catingyeclhac mokham, han' acvaanaamo moo yetca.



la·nyekhe maata' actemquescama yetca mooc quelvaana' ayetcoc



angcoo', mooc eeca catalh-nengvomho'; nengvet'aac maata'a nengyesecca acteema nac hay', queletsapaycam' maata' ayetcoc angcoo'.

Eeca' 'so yanyalhco quelvaana' yetcoc cata'mel-salhcho', yo'yaam' cootehe yetca, han' mepque taava nac a. Nooc nahan quennaavo-pquetcoc, nengeltamnaascaoc mepque-ptavascama quelvaana' yetcoc, caha-lhalhquehec vesey' eselhnac quelvaana'a nahan seca'a.



Englapamcoo'



Caasalhqueec nahan cal-yamhaapoc ayetcoc angcoo', actamha cooneng aanyo oc. Hooctem caasalhcac calyamhaapoc ayetcoc angcooc quelvaanaa', han' nenlheena-lhcac, cayemtelhec saat catemsec ayetca actamhac lhoho-nglapamcoo'. Eeca mooc nahan, cavan-


quehec nahan cata'melsec ayetca nataan acteeyam', ayenyem'a ayetcoc angcoo', seca'a mokham. Nooc nahan ataava', capvanquehec eta'melsec apquetca nahan aptaava', elenlha'amcho' 'se maata' apyaap. Taan nahan calvetac maata' acyemtalhnama a'net nac hay'; taap nahan alloom, calta'melam'ehe va'lha'aoc. Eeca' 'so nengeltemeem lapamcooc mokham enlhet nahan quelvaana'a.

Nengcoo' enlhet, paej yekhe' angmaycam' acteemac-lha nengelaaney'oo aanyo oc seca'a. Mooc vesity' maataa' aatay actamhac-lhoho cooneng aanyo oc; avanquec cahanec-lha', avanquec nahan capasmoc angquen'; vocmec sengelyam-hapmaclha'. Sas angelaanohoc acteema nac quelvaana' yetcoc hay', nahan apquennaavo'.



Mooc eeca', cavamho-ctemeem acvaanyam' acteemac-lha-nglapam-coo'; nooc nahan enlhet apquetcoc, mongenatsehec actemeem vaamlha-cnatheescam', taan calavsec maata'a. Cata'melehec saat calhohoc lhamoo taava', nahan elhohoc lhamoo-p-taava'. Eeque-ngcanyentac maata' angcanaec yo'yaam' catnehec aatay seca'a; eeca' 'so nengeltemeem nengvaanemquescama engquetca. Poooc enlhet, apvanquec emeesec apquetca mepque-cnatheescam', mepque-ploom nahan maases etengya-pquelan'ac-lha'; sas apvaanemquescama apquetca.

Poooc enlhet apquetcoc, vaamlha' aploom nahan apquelenme-lheeycam' apmoolhama, apyaap nahan angquen' acyetrac-lhoho-nyekhe' alaasekhay'oo. ¿Lha' actamaha ye? Ta'sec cayetnam' enga'tec. Que ya-lhmo-ngquenyem'ac nengelya-



hacihoo nac maata'a quelhvoo-nseca'a, taan caltamaac aptamhaec-lha neeten; cavomhoc saat apquenmelheeycam' aptaava', cata'melehec saat maata' apma.


Caymaalhqueec cayetnam' enga'tec angmeesec engquetca ap-mopvaan etengyac acta'melaycam' apva'lhoc nahan ava'lhoc, haave nengay'oo 'sa paa na-lvoc a; eeca' nenghayvescacmo maata'a, haave nengyahayqueclhoo 'sa. Poo enlhet apquetca, nengvet'aac



maata'a sas apva'lhoc, nahan maases etnaham', haave vaamlha-phaalhenmoo 'sa raatyo. Poo eeca', apqueltamhooc vaamlha' elaapahasam' apmoolhama, nahan apquel-halhneec mocmeescama a'soc. Paej maata'a calhnooc mooc nengvetay' apquetquec enlhet. ¿Soc laalha' actamha ye? Ta'sec saat cayetnam' enga'tec; ta'sec angeltaamsalhcohoc maata'a, yo'yaam' angya'sengveclhohoc nengco'o lha' acta'mela nengvaanemquescama engquetca.

Acteemaclha Sengelyamhapma

¿Co la nenteema angmeyvoc eng-quetca, yo'yaam' calyamhaapehe-nglapamcoo'? Catneclhehec vesey' caltemhe taava', lhoyquela camaayaha-pquennaavo', mongvanquehec angmeyvoc a taap. Heey', nengmasma engquetca acvesey' nengeltemnaascaoc ayeenmoo-tquetsec, nahan mepque nenlheenseeycam' maata' apquennaavo'; nooc nahan yoonges;



nengmaayahasquescama-cvesey' lha. Eeca' 'so nengmasma acpey-
vomoo nahan mepque nengloom; mepque nenselhnanangcama eng-
mooc. Han' aptemac maataa' enlhet nanooc hay'; acnoo nac se-
ngeltemnaascam' Pedro Anton apna Tarzo Amyep, Ya'alve-
Saanga, casaclhoo-pqueltemnaycam' lha: *Haave-cnaat alyamhap-
ma-pquetquetsec, paej nec naat cata'melooc calhec alyamhapsa
loomoo-pquetcoc, paej capvaanac aptengyey' a'soc. Eeque quelh-
voo nac hay', acvet'aac maata' apquetcooc alyamhapma, lheng-
casquec paej capvaanac maataa' epasmoc aptaava' pooc, quen-
yectac maata' apyaap a'soc*
*apac, yo'yaam' epasmoc
aptaava'. Eeque-nyekhe-ng-
caymaalhcac ma'a elya'-
sengvomo-pqueltamhaycam'
apangca'voo', yo'yaam' el-
temhec apasmoom apang-
ca'vooc apna'taamca'a,
mepque pasmaeclha-pyaap.*



*Acvet'aac naat co'o
acteemaclha' yo'yaam' cal-
yemhapamcoc, taan elhee-
nacpoc:*

— „iNehe pac lha! Paej capvaanac etengyac a'soc lha,“ catnehec
amya'a. „iCapvaana-ngyahayoc lha!“ catnehec maataa' amya'a.
„Eeca' enlhet apquetcoc mo-pyamongquelhma, saate-yca' angel-
yamhapsec ma'a,“ teemac elheenacpoc.
Mee naat maata' alaancamcoo apteemaclha'.

*Nooc nahan quelvaana' yetcoc. Paej angcooc cavaanac ca-
yepлом' nahan angquen', han' a quentem' nac actengyey' a, cavan-
quehec nahan calyamhaapoc, taan calheenalhac calta'heeycam':*

— „iCavanquehec calyamhaapoc calta'heeycam' quelvaana'a!
iMopque-lta'heeycam' lhe'e!“ catnehe-ngquen'. „iCavanquehec
capasmoc ataava', cahaneclhehec nahan!“

Angquen' angcooc aclhaan-
ma, quelteemooc vesey' cal-
yamhapsec ayetca a, acvaa-
nengvocmo alaaney' a'soc,
noo na-khanma. Sas cay'aa-
sengvomoc seclhooc actam-
haycam' actengyey' tamam-
'a nahan akhanma nentoom,
teema nac maata'a mooc
quelvaana' yetcoc, ya'seng-
vocmec tengyey' tamam'a,
acnelhpongaam nahan alaanaalhcoo a'soc, nahan tengyey'



quentem'. Taan catlhensec neeten
aptoom angyaap, yo'yaam' etooc
saat apva'actamo, angquen' ayen-
yemay' altemnaascaoc. Teemac-
lha-tquetsec maata' ayeenmoo
moltemnaascaoc, yo'yaam' saat
calhyavam'ohoc acvocmo-lyamha-
pa. Na'sooc nahan aleltemnaas-
caoc angquen' nanoo', naekhe'
paej mooc a'soc allaaney'. Paej
naat masentengyasquescama en-
taava'engquetcoc, ayenyem'a met-
naha-pquetcooc apquellhaanma.

Heey', vocmec neelha' amya'a nentengyey' seca'a nahan nen-
temquescama engquetca. Eeca' acteemaclha nengmoolhama seca'
ayetcooc, calheenec saat mooc vaetca'hac, acnoo nac vaetca'hac V.

Nenta'melquescama Engyempehec

Vaetca'hac allhaanma engyempehec

- I) Nenta'melquescama Nengmaclha'
- II) Nentoom Alta'malma
- III) Quelvaana' Anglavsoo'
- IV) Acteemaclha Nentemquescama Engquetca
- V) Nengmoolhama Seca' Ayetcooc
- VI) Naapnaclhama nahan Nengya'anma
- VII) Nengapnaclheeycam'
- VIII) Nengmasqueem Acyetna Engyempohoo'
- IX) Sentaclhama nahan Sengmoctay' Ascoc
- X) Nentengyey' Nenselhnaanemmalhca'

